

24 FEB 2000

Mahathir-Profesion

DR MAHATHIR BERI AMARAN PEGAWAI JANGAN RASUAH

KUALA LUMPUR, 24 Feb (Bernama) -- Perdana Menteri Datuk Seri Dr Mahathir Mohamad hari ini mengingatkan anggota perkhidmatan awam supaya tidak menjejaskan imej profesion mereka dengan mengamalkan sikap berpartisan dan rasuah.

"Kita mungkin percaya rasuah (yang) kita (lakukan) tidak akan dikesan.

"Tetapi jangan terlalu yakin. Kerana sudah ramai yang telah menerima hukuman berat," kata beliau ketika berucap pada majlis perdana Perkhidmatan Awam di Institut Tadbiran Awam Negara (Intan) Bukit Kiara di sini.

Seramai 500 pegawai tertinggi kerajaan menghadiri majlis itu.

Dr Mahathir berkata profesionalisme adalah penting untuk menentukan pentadbiran berjalan dengan berkesan.

"Profesionalisme bermakna khidmat yang diberi tidak berpartisan, tidak memihak kepada sesiapa, sebaliknya ia hanya bertujuan untuk menjayakan urusan kita," kata Perdana Menteri.

Majlis itu merupakan majlis dialog antara Perdana Menteri dengan pegawai tertinggi kerajaan yang turut dihadiri Ketua Setiausaha Negara Tan Sri Abdul Halim Ali dan Ketua Pengarah Jabatan Perkhidmatan Awam Tan Sri Samsudin Osman.

Selain menekankan profesionalisme perkhidmatan awam dan rasuah, Perdana Menteri dalam ucapannya menyentuh isu globalisasi, Tabung Kewangan Antarabangsa dan kerajaan elektronik.

Dr Mahathir berkata di Malaysia semua perkhidmatan kerajaan termasuk tentera adalah profesional.

Tentera, katanya, akan menurut arahan kerajaan semasa dan bukanlah menjadi peranan tentera untuk membentuk dasar negara sama ada di dalam atau di luar negeri.

"Tentera juga tidak memihak kepada mana-mana parti politik serta tidak mempunyai pendirian tersendiri. Kesetiaan tentera bukanlah kepada panglima atau pegawai-pegawai ketenteraan tetapi kepada kerajaan semasa yang memerintah.

"Sudah tentu jika panglima atau pegawai memberi arahan untuk menentang kerajaan maka ini tidak akan mencerminkan profesionalisme tentera dan sebagai anggota profesional, arahan seperti itu tidak mengikat tentera," kata Dr Mahathir.

Perdana Menteri berkata dengan itu Malaysia tidak akan menghadapi masalah seperti yang dihadapi oleh sesetengah negara lain yang memperlihatkan perebutan kuasa oleh tentera.

Disebabkan profesionalisme perkhidmatan awam juga, pentadbiran negara tidak menghadapi masalah.

"Setiap anggota perkhidmatan awam tentulah mempunyai pendirian masing-masing berkenaan politik negara tetapi dalam menjalankan tugas, soal pendirian peribadi tidak boleh diambil kira," katanya.

Mengenai rasuah, Dr Mahathir mengingatkan bahawa tindakan yang akan diambil terhadap pesalah adalah jauh lebih berat daripada rasuah yang diterima.

"Kita mungkin dipenjara dan masa depan kita akan hancur. Jikalau kita sentiasa ingat akan semua ini kita boleh mengelak daripada terlibat dengan rasuah sementara kerja kita dapat dilaksanakan dengan cepat dan licin," kata beliau.

Perdana Menteri berkata selagi penerimaan rasuah tidak menjadi budaya biasa, anggota perkhidmatan awam mempunyai harapan untuk menentukan khidmat

mereka bersih dan berhasil.

Dr Mahathir juga berkata ancaman yang dibawa oleh globalisasi kepada Malaysia dan negara-negara membangun lain seperti yang sering diperkatakan beliau "bukanlah bertujuan menakutkan" anggota perkhidmatan amam untuk memastikan kerajaan mendapat sokongan politik.

"Sebaliknya apa yang diperkatakan ini sudahpun berlaku," kata beliau sambil memberi contoh kejatuhan nilai matawang sesebuah negara, boleh memiskinkan sebuah negara yang kaya.

"Mungkin mereka yang ingin kerajaan tertentu dijatuhkan akan melihat peristiwa kejatuhan kerajaan sebagai satu kebaikan. Tetapi jangan fikir kerajaan yang menggantinya akan selamat.

"Jika kerajaan yang mengganti tidak sujud kepada kuasa asing, ia akan diancam dan dijatuhkan juga. Dengan perkataan lain, negara sudah dijajah," kata beliau.

Sebab itu, kata Dr Mahathir, anggota perkhidmatan awam harus berwaspada dan "tidak membakar kelambu kerana marahkan nyamuk."

Dalam usaha mewujudkan kerajaan elektronik, Perdana Menteri berkata adalah amat penting bagi semua anggota kerajaan menguasai penggunaan komputer dan Internet untuk meningkatkan prestasi serta produktiviti.

-- BERNAMA

ES RON